

RELAÇION MORALE PE L'ANNO 2017

Zena, a-i 14 d'arvì 2018

Bongiorno e scignoria a tutti, e graçie d'ese vegnui.

St'anno chi veuggio comensâ a mæ relaçion co-ina riflacion in scîa Compagna, perché me son réiza conto che quande chi no-a conosce me domanda còs'a l'é, arèsto in pò li e pòi diggo e sòlite còse, ma co-a sensaçion de no avéi dito tutto quello che gh'ea da dì.

Aloa. A Compagna a l'é 'n asociaçion ch'a l'à squæxi çent'anni, e za pe questa sò ançianità a merita o rispèto e a conscideraçion che, pe dì a veità, gh'en de longo riconsociui. Ansi, se semmo réixi conto che de spesso a mette finn-a sogeçion, e questa a no l'é 'na bèlla còsa, perché a poriéiva alontanâ e gente in cangio de avixinale, e in sce questo ghe travagiemo.

Chi pòrta avanti a Compagna en i sòcci, semmo tutti niatri: a-o 31 de dixerbre eivimo 657, ma o numero o cangia de longo perché gh'é e neuve iscruçion (64 into 2017) e gh'é chi se trasferisce a-a sede da Compagna che l'é in çê, dôve i sòcci en ben ben ciù numerozi.

Squæxi l'80% de niatri o l'à ciù de 60 anni, ma l'é anche giusto ch'a segge cosci; semmo 'n asociaçion nasciua pe conservâ memòia e tradiçion, còsa che anche inte famigge o l'é conpito di vegi, perché i zoeni àn da pensâ a-o futuro, a fâse 'na poxiçion e 'na famiglia; solo dòppo, quande saian maturi, vegnian a iscrivise.

I òmmi en squæxi o dopio de dònne, e gh'é raprezentòu in pò tutti i mestê e e profescioin; stemmo de caza squæxi tutti a Zena, quarchedun o sta in atri pòsti da Liguria ò inte atre regioin ò âdreitua a l'èstero.

Rigoardo a-e atività da Compagna (che, no scordemose, a l'é pe statuto apartitica e aconfessionale), çerchemmo de fâ tutto o poscibile pe consegò i scòpi che gh'à dæto i fondatoî, ch'en questi (in repasso do statuto ògni tanto o no goasta): "incentivâ o recùpero, a continoaçion e a valorizaçion da lengoa, da coltûa e da stòia zeneize e promêuve, òrganizâ, realizâ, partecipâ e contribò a tutte e iniçiative liguri d'arte, coltûa, educaçion morale e fixica". E ancon: tegnî uniî e concòrdi i zeneixi e i amanti de Zena, perché pòssan, quande ghe n'é de bezeugno, fâse sentî da-e Aotorità in diféiza di interèsci da Liguria e da sò aonomia. E l'é pe questo che ciù tanti semmo, ciù fòrte a l'é a nòstra voxè.

E dunque, anche l'anno pasòu o nòstro prescidente o l'à tegnuo o corso de zenéize avèrto a tutti e ben ben frequentòu, e o l'é stæto senpre prezente, anche con di sòcci da Compagna, o venerdì séia a Primocanale pe-a trasmiscion in zenéize Liguria ancheu, segoitiscima inte tutta a region; l'é stæto mandòu i nònni inte scheue pe avixinâ i figeu picin a-a nòstra bèlla lengoa, ma no scordemose che l'unico mòddo pe fâ che l'inpréndan veramente o l'é parlaghele in caza, comme dimòstran i figeu che partècipan a Liguria ancheu. Co-i studenti de superiori va avanti l'iniçiativa *Crescere in Compagna*.

Senpre pe sostegnî a nòstra lengoa, emmo partecipòu a-e messe con de parti in zeneize: a Pasquèta inta gexa de Campi, o 30 d'arvì a Santa Zitta pe-a fèsta e o 28 de mazzo a Cornigen.

Cian cianin ma con continoità va anche avanti a domanda di contrasegni Chi se parla zeneize: do 2017 n'emmo consegnòu eutto, e in tutto semmo za arivæ a 27.

Tutti i martedì gh'é stæto e conferense in Sarzan, a Paxo emmo prezentòu de venerdì quatòrte libbri e o publico o l'é senpre stæto numerozo.

A sede, in cangio, a no l'é goæi frequentâ, sciben che a nòstra

biblioteca Baglini, co-i seu ciù de 5000 volummi in sce Zena e a Liguria, a segge òramai tutta riordinâ e a disposiçion de chi voese fâ de riçèrche o senplicemente pasaghe quarche òa in paxe: òua a l'é anche ben rescadâ d'inverno e fresca d'estæ, perché gh'emmo misso l'aia condiçionâ.

O boletin o l'é sciortio pontoale ògni trei meixi, con quaranta pagine ciù l'insèrto (inte l'urtimo gh'emmo misso o lunaio) e in tanti ne dîxan ch'o l'é bèllo e ne fan i complimenti.

Emmo fæto ben ben de vixite goidæ, in çità e feua Zena: o Muzeo do Gazzo a-e Gavette, a fabrica da bira Maltus Faber a Fegin; o Muzeo de l'Atore a-o Semenaio; o Fòrte de San Giulian, dove gh'é o Comando di Carbinè; o salumificio Cabèlla a Sant'Orçéize, co-o trenin de Cazella; a Lanterna; a mostra in sciò zeneize a l'Archivio de Stato; a Villa Durasso a Santa Margàita.

I apontamenti fissi, dove semmo a fianco do Comune e da Gexa, n'àn visti prezenti in fòrse, derè a-o nòstro bèllo gonfalon: e porcescioin do Corpus Domini e de San Gianbatista, o Balilla, o voto in Oeginn-a e o Confeugo, trionfale! Pe-e Giornæ de Colombo a Compagna a l'à anche fæto e pagòu o catalogo da mostra de medagge e monæe da coleçion municiपाल.

Anche i Premi da Compagna àn avuo succèso, e i premiæ àn pòi partecipòu a-a trasmiscion Liguria ancheu in sce Primocanale.

Comme ògni anno emmo òfèrto a-a çità o spettacolo A Paxo in zeneize, e stavòtta no emmo dovuo fase inprestâ e atresatùe perché se l'emmo acata: amplificatò, casce, micròfoni e tutto, e òua poemmo ese niatri a inprestali a-i gruppi muxicali che no ghe l'àn. Ne fa piaxe poi dî che senpre ciù de spesso a Compagna a riçéive inviti e domande de colaboraçion anche inatèize, comme quella de doe squadre de *scout* che àn vosciuo ese aconpagnæ da niatri in gio pe-i caroggi da Madænn-a: gh'emmo mostròu a nòstra sede e l'emmo anche portæ a vedde comme se fa a fugassa.

Òrmai semmo invitæ a tutte e porcescioin e fèste religioze: in ciù do Corpus Dòmini, San Gianbatista e Santa Zitta, anche San Pancraçio de l'Ordine de Malta, Sant'Antonio de Bocadaze co-e confratèrnite, a Madònna de Graçie a Ôtri pe-a procesion into parco da villa da Duchessa, a Madònna de Vigne pe-a fèsta.

N'àn invitòu a l'inaogoraçion do restàoro de l'aereo S.V.A. Monoposto da Fondazione Ansaldo, into ciasâ de l'ariopòrto, e pe l'antepimma de Natalidea, a-a Fea do Mã, àn vosciuo che metéscimo a l'intrata o nòstro prezepio co-a neuva figurinn-a, o Paganin, prima de portalo a-e Graçie de Ôtri, che ne l'àivan domandòu. N'àn finn-a invitòu a l'inaogoraçion de l'Expò da Fontann-a Bonn-a, e ben voentea a Compagna a l'é stæta prezente anche li.

Ne domandan asci sovente o patrocinio, e anche questo l'é segno de grande conscideraçion.

Son anæta in pò de palo in frasca e m'ascòrdo seguò quarcòsa, ma paciensa: into scito e inti boletin gh'é memòia de tutto quello che s'é fæto.

Concluddo parlando de dinæ: a Compagna, into seu picin, a ghe n'â e a-i spende pe Zena, comme òua ve diâ meglio a nòstra tezeora. Insomma, diæ che poemmo ese sodisfæti e amiâ o futuro con serenità: se a Compagna a l'aniâ apreuvo a-i tempi restando de longo a mæxima, comme a reginn-a Elizabetta, a Setemann-a Enigmistica e Topolin, a no temîa a concorenza e a saiâ senpre in ponto de riferimento pe-a çità.

Alegri!

Isabella Descalzo
Gran Cancelliera